

Nwàk nè Ba nè PITA à Còm

Pità à còm ñwàk nè ba ènə ñgòcèp bə mɔwèes sè bùu mok wèŋ sə yə'rə yà' mɔ cos nə sə. Wo à sə dək də Jisòs nə kà mok bwi vè. Yi sə tsok fa wo də Jisòs sə cu mam ve'nə bùusè yi ka dzəm də ñwè nəmòok bisə dzəm, yi sə fa mandzè də ndàaŋwè pwe' bùuŋ gesə mɔwe' bɔp awo ñkuŋ ya yi bwi foho və.

¹ Còm ñwàk nè'e mùu Saimù Pità, nè mɔ mo ñgà fàk Jisòs Krest nə ye sè' ñgà gè ntum ye. Mù sə còm fa nà' bohòwèŋ bùu sè wèŋ a fa ntum awèŋ bohòyi yà'a. Jisòs Krest nə gùgè bum ye pwe' bə mandzè nè kèkùrè də ya vesùwèŋ fa ntum bohòyi. Nsàp yu nè yi a gù fa wèŋ nə yà' bòkùrə bə sè yi a fa vès sə. Jisòs Krest nə Nwì nə ye sè' ñgà lùŋsè ves.

² Mù lɛŋ də mɔvè'nè wèŋ sə rì lòTà Jisòs nə ye Nwì fana, Nwìi nə gɔ də bəbo ye bə fifi ye yam ghaha bohòwèŋ anə yamə.

Wèŋ Cum Ncu Nè Co Nà' Niŋ Də Nwì A To Wèŋ Lan

³ Nwìi nə a jə ñàaŋ ye sè ghaŋ sə, nə fa vesùwèŋ bum sè a sə dzəm yà' pwe' ñgòcu ncu nè bəboŋ, nè co nà' gɔ Nwìi kwa. Yi a gù də vesùwèŋ tse' bum yè'sə bə mandzè nè də vès rì ñwè nè yi a to ves nə. Yi a to ves bùusè yi maŋgəŋgèŋ nə ye sè' bəboŋ.

⁴ Yi a gù vɛ'nə fana ye də yi fa vesùwèŋ bum sè yi ànə kak ves yà', sè yà' tse' swe' bohòvesùwèŋ wùriŋ sə. Yi à gù vɛ'nə də ya wèeŋ swirə bɔp nè nà' cu sənə nzeŋgòŋ nə, nè nà' sə tesə vè bohòbɔp sè bwì sə dzəm yà' sə, fana nə tse' ɛ nsàp ntəm nè nà'a co nè Nwì.

⁵ Ye də mvè'nè wèŋ a fa ntəm awèŋ bohòJisòs fana yà'a kà fa'nə lè təeŋ. Wèeŋ jihi nzòŋ gɔgɔŋ, nə yamsə naaŋ gesə bum mok sè bèboŋ mbwa; wèeŋ ye də wèŋ yamsə naaŋ də wèeŋ kà sənə bɔp nənək gbù ni. Nə yamsə naŋ fe'lə ŋkərè nè ŋgòrì bum sè ma nè Jisòs.

⁶ Anə kà ŋkərè mègù, wèeŋ yamsə naaŋ fe'lə nè ŋgòko ni' awèŋ mbwa sè'. Wèeŋ sə ko ni' fana wèŋ yamsə naŋ gesə kontəm mbwa. Wèeŋ sə ko ntəm, wèŋ yamsə naaŋ fe'lə ŋgògù bum sè yà'a bə mandzə Nwì pwe'.

⁷ Wèeŋ sə gù bum sè yà'a bə mandzə Nwì sə fana wèŋ yamsə naaŋ nè ŋgòjə ndaaŋwè pwe' co moma yo. Wèeŋ sə jə ndaaŋwè pwe' vɛ'nə fana wèŋ yamsə naaŋ nè ŋgòdzəm bwìŋ mbwa sè'.

⁸ A ye-a ŋga wèŋ sə gù bum yè'sə, nə sə gu ghaha yà' ghaha fana ye də mvè'nè wèŋ a rì Tà àvès Jisòs Krest sə nə kà wà ye, ncu awèŋ nə nə tse' fàk bèboŋni.

⁹ Bùu sè wo sə kà-a yàwo vɛ'nə gù fana wo co ŋwè nè yi kà səsap yə gèsègè, wo co ŋwè nè lis ye à loho laŋ. Wo a swì bisə də Jisòs à cùk fis fa wo bɔp awo sè wo à gù sə laŋ.

¹⁰ Bwema am wèŋ, bum yè'sə nə yeè nə vɛ'nə fana mù ləŋ wèŋ wùriŋ də wèeŋ jihi nzòŋ, nə

gũ nga yà'a nĩntsoƙ dɛ Nwì a to cok fis jɛŋ wen dɛ ya wɛɛŋ ye bũu ye wɛɛŋ anɛ zìnɛ. Wɛɛŋ gũ-a vɛ'nɛ fana wɛɛŋ kà maŋkwɛŋ gbũ fohòlòyuk.

¹¹ Yà'a mvwe' sɛ Nwì nɛ muk fa li wen mandzɛ nɛ ɛgòkɛ ni mvwe' gaŋ ɛkum sɛ Tà àvɛs Jisòs Krɛst, nɛ yi sɛ' ɛgà lùŋsɛ vɛs nɛ; fana a cum mam mok vesi wɛɛŋ nɛ mvɛsɛ.

¹² Bum yɛ'sɛ nɛ yeɛ nɛ vɛ'nɛ fana mù dzɛm dɛ mɛ sɛ tsɛrɛ fa wen yà'. Mù rì sɛ' dɛ wɛɛŋ a rì zìnɛ nɛ sɛ' laŋ, nɛ sɛ tɛɛŋ nɛ bɛ zɛŋ sɛ' guguŋ.

¹³ Mɛgu dɛ nɛ mù cu tse' ntòfo' bɛ lis nɛ'e fana yà' sɛ bòmɛ yàm dɛ mɛ sɛ tsɛrɛ fa wen yà' ghà yà lònŋ, ya nga wɛɛŋ ye mali bɛ zɛŋ cɛcuŋ.

¹⁴ Mù rì dɛ ka mok sɛsap cum fe'lɛ ya mɛ fwɛŋ mak gɛsɛ ɛgùpni' nɛ'e fo'. Mù rì vɛ'nɛ bũusɛ Tà àvɛs Jisòs Krɛst a tsɛ' mɛ vɛ'nɛ yi jɛja.

¹⁵ Mɛ nɛ jìhi nzònŋ, nɛ lap noŋsɛ fa wen mandzɛ nɛ co dɛ a ye-a nga mù kpɛ lòyàm sɛ laŋ fana wɛɛŋ sɛ tsɛrɛ mali bum yɛ'sɛ fo'.

Vɛs Sɛ Tsɛ' Ka Bum Sɛ Nwɛ Tsɛrɛ Kok Yɛŋ

¹⁶ Vɛs a tsɛ' fa wen mvɛ'nɛ Tà àvɛs Jisòs Krɛst ànɛ tesɛ vɛ bɛ ɛàŋ yà'a laŋ. Bum sɛ vɛs a tsɛ' fa wen yà'sɛ, ka ncɛɛp cùu sɛ wà sɛ bwìŋ a tsɛrɛ kok gù yà' bɛ ɛkɛrɛò yàwo, nɛ sɛ cɛp yɛŋ. Yà'a yumok sɛ vɛs a yɛ ɛàaŋ ye sɛ bɛ lis avɛs.

¹⁷ Ghà nɛ Tà Nwì ànɛ yamsɛ yi, nɛ kuksɛ yi nɛ, à ye nga vɛes sɛ' fo'. Vɛs à yuk mvɛ'nɛ Nwì nɛ yi yam càsɛ ndàaŋwɛ pwe' yi nɛ à sɛ cɛp dɛ, <<Nɛ'e mo àm nɛ mù dzɛm yi, yi gùgɛ ntɛm àm sɛ kwa wùriŋ.>>

18 Vès à ye mùmvwè' nda nè Nwì ànə və mbwa nà'a ves Tà Jisòs wèŋ bəbɛ', nə yuk ŋgì nə mvə'nə nà' sə cèp vèsə mubu bə ntu' avès.

19 Vesùwèŋ rì tse' ŋga'a mok pap də bum sè ŋgàa tsòhòbum Nwì wèŋ sè njamòk à cèp sə yà'a zìnə bùu bum sè vès a yə yè'sə. Ye də anə boŋ bohòwèŋ wùriŋ ŋga wèŋ fa-a ŋkərə awèŋ bohòncèp ènə, bùusè nà'a co laàm nè nà' sə rɛŋ mvwe' ndzəndzəm tètè kə dzeŋ ghà nè tsok sə də a rɛŋ. Ghà nè sètsok kok kàmòk fana wèŋ ye rɛŋ wes bum sə ntù wèŋ anə. *

20 Yusè guguŋ sə a də wèŋ riŋ də, bum sè ŋgàa tsòhòbum Nwì wèŋ à cèp, nə com ndzənə ŋwàk Nwì sə à ka yumok sè bwì à tsərə kok yà' sə vèə wo bə ŋkərə nè njàwo yeŋ.

21 Ncèp nè ŋgàa tsòhòbum Nwì wèŋ à cèp nə wo à ka nà' bə ñaŋ yàwo cep, Yòŋsə Nwì ànə ni sə ntù wo ŋkuŋ nà' sə gu wo, wo cep bum sè yà' sə tesə vè bohòNwì.

2

Jəŋ Nkərə Bə Mvwès Sè Bùu Mok Sə Yə'rə

1 Anə ye to mantombì fa', bùu sè wo à sə duk də wo sə tsòho bum Nwì ŋga wo sə cì' mvwès wèŋ à ye mɔŋgorè bùu Nwì wèŋ. Yà'a niè' sè' vɛ'nə də bùu sè wo yə'rə fagè bwì mvwès wèŋ nə ye mɔŋgorè wèŋ sè'. Wo nə wooŋ və, nə sə yə'rə fa bwìŋ yəyə'rè nè bə jòn nè nà'a nə gu

* **1:19 1:19** Sètsok nè wo sə to nè'nə, a Jisòs, bùusè ndzənə ŋwàk Bum sè Nwì a Nitsè' Fa Jon 22:16, fana wo to Jisòs sè' bə liŋ yà'sə vɛ'nə.

bupsə bwìŋ. Wo nə dzeen masà àwo nè yi ànə kə tiŋ və tu awo yi nə mwè. Anə kà sàp fana nsàp ŋgə' nè bup nə və mu tuhù wo bùu nsàp yu nè wo sə gù ànə.

² Bwìŋ ŋkùuŋ nə be' mandzè awo nè jì marè'tu nə. Bùu yè'sə wèen nə gu bwì wo sə cèp bum sè bup bə mandzè Nwì nè nà'a zìnə nə.

³ Ngàa yər'rè fa bwì mvwès yè'sə wèen dzəm mègù də wo tse' bum pwe'fo' wo. Fana wo sə borə kə' weŋ bə mvwès də ya wo tse' swe' awo fo'. Nwè nè yi sakgè nzak ànə fàhə ye ntinə bùè ŋgòyeŋsə wo ŋgə'. Anə kà sàp fana yi mesə wo pwe'fo'.

⁴ Ja'a na yàwèen yusè Nwì ànə gu mvè'nè masinjàa Nwì mok wèŋ ànə gu bup yà'a nè. Yi à ka wo wà me'rə. Yi à ko màk gèsə wo mvwe' ŋgə' nè sə misè. Wo nòca bə kwan, ndzəm sə seŋ ca sè' ŋkùŋ. Wo nə cum mam ca vè'nə tètè kə wes nùmbu sak nzak.

⁵ Bùu sè njamòk sè wo à gù bup yà'a, yi à ka wo wà sè' me'rə. Yi ànə gu ndzəp rwiŋ, nə zə wes wo. Bùu sè yi ànə gu yumok kà wo gù sə, à ye mègù Nuà nè yi à sə tsòho fa bwì də wo gu yusè yà'a bèboŋ. À swirə mègù Nuà nə bə ndap ye, wo à ye bwìŋ sàmba.

⁶ Bùu sè wo à sə cugè mvwe' lak Sodòm bə Gòmorà yà'a wèŋ à gbù nzak bohòNwì sè'. Nwì à tè vèpsə lak yà'sə pwe' nè pwe'. Yi à gù vè'nə ŋgònì fa bùu sè wo nè kà bohòyi yuk də yi nè kə yeŋsə yà' ŋgə' ntsə'mòk.

⁷ Yi ànə caŋsə gèsə megu Lot yiìyi, nè yi à sə be' ye mandzè nè nà'a zìnə. Lot nə à sə yəgè

nsàap bup sè lak yà'sə wèŋ à sə gùgèə fana ntum sə yaa yi.

⁸ Yi à sə cugè mutsətsə'rəə bùu sè bup yà'sə wèŋ, nə sə ye bup sè wo à sə gùu sə nùumbu pwe'. Yi à sə yukgè bum sè bùu sə wèŋ à sə cèep sə sè'. Bup sè bùu sə wèŋ à sə gùu sə à sə yaan bup yi sə ntuu co wù kà fùk, bùusè yi à ye ŋwè nè yi à sə be' ye mandzè nè nà'a kəkurè.

⁹ Bum yè'sə sə nì fa vesùwèŋ də Tà Nwì rì mandzè nè aco yi nonşə bùu ye wèŋ ya wo swirə ŋgə' nè nà'a nè kè vè nè. Bum yè'sə sə nì fa vesùwèŋ sè' də yi rì mvè'nè aco yi sə gu ŋgàa gù bup wèŋ tètè kə wes nùumbu nè yi nə sak yà'wèŋ, nə yeŋsə wo ŋgə'.

¹⁰ Bùu sè wo nè yə ŋgə' ènə nə casə bwìŋ pwe', a nsàap bùu sè wo gù mègù yàwo yusè ntuum awo sə dzem də wo gu yà'a; nə ye fe'lə bùu sè wo bèŋgè ŋgòyuk bohòbùu sè yà'wèŋ mantombii wo.

Ŋgə' Nè Nà' Sə Tə' Bùu Sè Wo Sə Gù Bup

Bùu yà'sə wèŋ kà yumok wəpgè nə ye sè' gugutu. Wo kà yòŋsəə sè bwìŋ tse' ŋgòwəp wo yà'a sè' wəp, wo sə yak yà' yàak.

¹¹ A mègù-a sè masinjàa Nwì wèŋ sè wo gu ghak ŋgàa yə'rè fa bwìŋ mvwès yè'sə, wo kà liŋ yòŋsəə sə mantombii Tà yàkgè.

¹² Bùu yè'sə wèŋ cèpgè yusè bup bə yumok sè wo ka bə zeŋ rɛɛŋ. Wo sə gù bum bə mandzè ləm, co nàam ŋaŋ sè wo kùrə mègù ŋgòtəm zə wo təmə. A zìnə də mvè'nè wo sə bupsə bùu mok yà'sə, wo nè kè kpə màha ntsə'mòk wà.

13 Ngə' nè wo sə fa bwìŋ ànə, Nwii nè làk fəsə wo sè' bə ngə'. Bùu yè'sə wèŋ sə dzəm mègù ngògù yusè ni' awo sə dzəm yà'. Bum sè ndzəmè, wo sə gùhù yàwo yà' maràŋ kwan. Nsàp mandzè àwo ànə sə jə vè marè'tu bohòbùu Nwì wèŋ wù kà fùk. Wo zù be'ləgè zuzù wenə wèŋ mvwe' mò'fis, wo sə wooŋ lo mali ngòkè gù bup, nə sə kwa bə zeŋ.

14 Wo jə mvək àwo pwe' ngòtsərə mègù bə nza' ko nto, wo gu bup, nə kà wòlok. Wo yə bùu sè wo ka gùgùŋ bə bum sè ma nè Nwì yeŋ fana wo borə yà' ngòmè'rə mandzè nè Nwì nə. Wo à ləŋ yàwo bə nsàp nè ngòtsərə də wo tse' megu bum pwe' wo nà'a laŋ. Nsàp bù ànə a gbù nzak bohòNwì tè.

15 Wo a mè'rə mandzè nè rərəŋ nə, nə be' lònə mok nè bə jòŋ. Wo a be' lòmok mandzè Balàm nè mo Biyònà'a. Balàm nə à ye ŋwè nè yi à sə kwa ngògù yusè bup ya yi tse' mbàm fo'.

16 Anə geŋ Nwì nə jwa sa'rə yi bə bup ye nə. Anə ye də mvomndè' nè yi kà cù cèpgè nè'e à cèp bohòyi co ŋwè sə cèp yi. Yi à cèp ve'nə, nə gu ŋgà tsòhòbum Nwì nə yi teŋsə ngògù yu ləm yè'sə.

17 Ngàa mvwèes yè'sə wèŋ mègù co mvwe' sè ndzəp à sə tesəgè fo', nə yum bisə lo. Wo mègù sè' co mbàk nè fəfə kè bwì' samsə nà' ŋga nà' ka mbùŋ ntòli. Nwì a fùhù nòŋsə fa wo mvwe' ŋkəŋkes ndzəm nè wo nè kè cu fo' laŋ.

18 Wo cèp fomsə bòŋsə ncèep sè wà kè cùhu wo, nə sə lap ngòbòrə bùu sè wo sə də wo me'rə mandzè bùu sè wo ka Nwì riŋ sə. Wo sə lap

ngòbùsə yà'wèŋ ve'nə də ya yà'wèeŋ sə gu megu bum sè yà' sə bònì' awo sə.

¹⁹ Wo sə kak fa bùu yà'sə wèŋ də yà'a nə cum bə tu yà' mvè'nè yà' dzəm, nga wo sè wo sə cèp sə cu ŋkwèŋ bohòbup. A ve'nə bùusè yusè yà'a ko kiŋ tse'-a ŋwè lòoŋ, ye də ŋgəŋgəŋ cu ŋkwèŋ bohòyu ànə.

²⁰ A ye-a nga bùu sè wo ànə riŋ me Jisòs Krest nè yi Tà nə ye ngà lùŋsè vès, nə caŋ tesə sənə bum nzeŋgòŋ sè aco yà' bupsə ŋwè sə fana nə kə gbə ni ca sèmok; ye də ncu àwo nè maŋkwèŋ nə bup càsə mvè'nè wo à ye to mantombi.

²¹ A ye-a ve'nə ye də ànə boŋ ghak le co wo kà mandzè nè zìnə nə rì yuk, nə nonşə də wo rì wes yà' làaŋ, nə me'rə fe'lə lùuk Nwi sè rərəŋ sə, nə kà yà' mok bə'.

²² Nsàp nè wo gù ànə sə ni də ncèp nè bwiiŋ cèpgè nè nà'a zìnə. Ncèp nè də, <<Ŋgbə lu, nə kə te' zə fe'lə yà' sèmok.>> Ncèp mòk ye sè' də, <<Wo cùk fa ŋgùnaŋ ni' də ya yi ye rərəŋ, yi bwi lo, nə kə nooŋ dzərə sənə mwè' sèmok.>>

3

Jisòs Nə Və Tsooŋ Mvè'nè Yi A Kàk Nə

¹ Ŋge' am wèŋ, nè'e nga'a ŋwàk àm nè ba nè mù còm fa weŋ. Ndzənə ŋwàak am sè ba sə pwe'fo', mù a sə ləp mandzè ngòtsərə fa weŋ bum yè'sə, ya wèeŋ riŋ tse' yusè yà'a rərəŋ sə.

² Mù a còm bum yè'sə ya wèeŋ sə tsərə ncèp sè ngàa tsòhòbum Nwi sè rərəŋ wèŋ à cèp njamòk də yà'a nè kə ye ntsə'mòk sə. Wèeŋ sə tsərə tse' lùuk sè Tà Jisòs nè yi sè' ngà lùŋsè vès,

à tsè' wɛŋ cùhu ŋgàa ntum ye sè yi à tum yà' dɔ wo kɛ tsok wɛŋ ŋgògùu yà'a.

³ Yusè mù sɛ dzɛm dɛ wɛɛŋ riŋ to sɛ dɛ, ghà nè nzeŋgòŋ nè'e kɛɔp ŋgòmèe fana bwiiŋ nè tesɛ vɛ sè wo nè sɛ gɛ bum mvè'nè bòwo. Bùu yè'sɛ wɛɛŋ nè sɛ ywi ncèp nè Nwì nè.

⁴ Wo nè sɛ duk dɛ, <<Jisòs ànɛ kak dɛ yi nè bwi vɛ sèmok àlaa? Yi nè yeè nè fò? Tɛ' avès wɛŋ à kpɛ wes lòntinɛ bùè, bum pwe' cu mali mvè'nè yà' ànɛ ye to mantombi; yumok nè mò'fis ka kupsɛ lok.>>

⁵ Bùu sè wo sɛ cèp vɛ'nɛ yè'sɛ, wo dzɛm tsɛ mègù wo ŋgòbɛŋ dɛ Nwì ànɛ cɛp bɛ cù wà fana ntòbu bɛ nze tesɛ vɛ. Yi ànɛ gɛ nzeŋgòŋ nè bɛ ndzɔp fana a yà'sɛ dɛ nzeŋgòŋ à tesɛ ndzɛnɛ ndzɔp.

⁶ Yi à jɛ sè' ndzɔp, nè gɛ bɛpsɛ nzeŋgòŋ nè bɛ zeŋ ghà nè ndzɔp ànɛ rwiŋ nè, nè ses lok nzeŋgòŋ nè pwe' nà'a.

⁷ Nwii nè sɛ nòŋsɛ ntòbu bɛ nzeŋgòŋ sè yà' cu ŋga'a fo' yè'e sè' bɛ ncèp ye nè dɛ yà'a nè cu li vɛ'nɛ tètè kɛ dzeŋ nùmbu nè mis nè tè vɛpsɛ yà' pwe'. Yà'a nè cu fo' tètè kɛ dzeŋ nè yi nè sak bwiiŋ pwe', nè lɛsɛ bùu sè wo à ka mandzè ye bɛ' yà'a wɛŋ.

⁸ Nge' am wɛŋ, yumòok mò'fis nè wɛɛŋ kà nà' swi. Yu nè dɛ lùumŋgòŋ ncùhù mò'fis bɛ nùmbu nè mò'fis mègù bohòTà Nwì pwe'fo' yɛyɛrɛ, zɛzook fo' bùè.

⁹ Bùu mok sɛ tsɛrɛ dɛ Tà sɛ càsɛ mvèk ŋgwàaŋ wùriŋ, nè kà yusè yi ànɛ kak dɛ yi nè gɛ sɛ gù. Yusè dɛ Nwì sɛ ko ntum, bùusè yi sɛ kà dɛ ŋwè

nəmòok bisə dzəm. Yi sə dzəm də ndàaŋwè pwe' kupsə, nə bwi fa bəp awo ŋkwèŋ.

¹⁰ A ye-a sè ve'nə fana, Tà Jisòs Kræest nè bwi vè ye vèə. Yi nè vè co ŋgà yè vè yi. Mvək ànə ye, bwìŋ yuk ŋga sè cwì ve'ε nèbup, fana bum sè yà'a ma mabu nè nom bisə wà. Bum pwe' sè vəp wes, nzeŋgòŋ nè bə bum sè yà' cu ca sè pwe'fo' nè nom bisə wes wà.

Fa Ni' YòBohòNwì Nə Sə Tək

¹¹ Mvəsə vesùwèŋ rì də bum pwe' nè kè nòm bisə ve'nə fana ye də a bəboŋ də a cum ncu nè nà'a ve'ε bəboŋ wùriŋ. Wèeŋ noŋsə fa ni' awèŋ bohòNwì pwe' nè pwe', nə sə yuk yi bə bum pwe' sè'.

¹² Wèeŋ sə kək megu lis bə nùmbu nè Nwii nè vè nè, nə sə lap mandzè ŋgògù sè' gəgəŋ co də nùmbu ànə kə dzeŋ nènək. Nà'nə nùmbu nè ntòbu nə sə nom bisə fana bum pwe' sè vəp wes.

¹³ Megu də Nwì a kək vesùwèŋ laŋ də yi nè gə ntòbu nè fi bə nzeŋgòŋ nè fi sè', fana bum nə megu mok fo' pwe' sè bəboŋ. Yà'a yusə a sə kək ŋga'a zeŋ sə.

¹⁴ Nge' am wèŋ, mvè'nè wèŋ sə tək nùmbu ànə fana wèeŋ lap mandzè gəgəŋ co yi kè bwi vèə, yi tseŋ weŋ ŋga wèŋ ka jòn bohòNwì gə; ya weŋ Nwì wèeŋ ye cù mò'fis bə fifi.

¹⁵ Wèeŋ jəŋ lɛ də njo nè Tà Jisòs sə kà ntòvè nè, a ŋgòfa mandzè də ya ndàaŋwè pwe' tse' lùŋ. Tètà àvès Pol nè vesùwèŋ dzəm yi nà'a còm fagè weŋ, yi sə tsok weŋ sè' ve'nə bə ŋkərè nè Nwì a fa yi nè.

¹⁶ Ndzənə ηwàak ye sè yi còmghè yà' lòn, yi sè cep kum bə zəη məm̀və̀'ànə. Yi còmghè bum mok ndzənə ηwàak ye sə, sè yà' gə ηgòrɛɛη yà'. Bùu mok sè ηkərèə awo ka pap təəη, nə ye sè' ηga wo ka yumok riη wèη fana wo jəη ncèep ye sə, nə sə cwɪη bəsə yà' m̀və̀'nè wo cwɪ b̀səgè ncèep mok sè ndzənə ηwàk Nwì vɛ'nə. M̀və̀'nè wo sə g̀vɛ'nə fana ye də wo sə to naaη ηgə' m̀ tuhù wo.

¹⁷ Nge' am wèη, m̀vəsè wèη rì yàwèη bum yè'sə laη fana wèη jəη ηkərè də ya bùu sè wo sə kà yàwo mandzè Nwì bɛ' yà'a kà wəη ma njàwo nè bə jòn sè lò. Ya kà də wo kpes fis wəη m̀vwe' yàwèη sè bəbən sè wèη tə yà'a duk.

¹⁸ Wèη gə ɛ nè ηgòrì ghaha lòTà àvès Jisòs Krɛst nè yi ηgà l̀nsè ves, nə sə gəη wesə lo mantombì bə b̀vəm nje nə. Vesùwèη fa yi kəkuk̀sè nə kà tɛ̀sə yuk. Yà'a ye vɛ'nə.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

c475d5b3-da44-51cf-93ca-f255b72fe481